

CONVENIO DE COLABORACIÓN ENTRE O SERVIZO GALEGO DE SAÚDE E A FUNDACIÓN BIOMÉDICA GALICIA SUR (FBGS) PARA O DESENVOLVEMENTO DO PROGRAMA DE MEDICINA PREDITIVA PERTENCENTE Á INFRAESTRUTURA DE MEDICINA DE PRECISIÓN ASOCIADA Á CIENCIA E Á TECNOLOXÍA (Programa Cohorte IMPaCT)

Santiago de Compostela, na data da sinatura dixital: 5 de outubro de 2023

INTERVEÑEN

Dunha parte, **don Julio García Comesaña, conselleiro de Sanidade e presidente do Servizo Galego de Saúde**, con domicilio no Edificio Administrativo de San Lázaro, avenida de San Lázaro s/n, 15703, Santiago de Compostela (A Coruña) e CIF.: Q65500006H, en nome e representación do mesmo e en virtude das facultades que lle confire o artigo 34 de la Lei 1/1983, do 22 de febreiro, de normas reguladoras da Xunta de Galicia e da súa Presidencia, de conformidade cos Decretos 136/2019 e 137/2019, do 10 de outubro, polos que se establecen as estruturas orgánicas da Consellería de Sanidade e do Servizo Galego de Saúde respectivamente; así como co establecido na Lei 1/2016, de 18 de xaneiro, de transparencia e bo goberno; na Lei 9/2007, de 13 de xuño, de subvencións de Galicia e polo Decreto 11/2009, de 8 de xaneiro, polo que se aproba o seu Regulamento e na Lei 40/2015, de 1 de outubro, de réxime xurídico do sector público.

E, doutra parte, **Don Francisco Javier Puente Prieto, Xerente da Área Sanitaria de Vigo**, comparece en nome e representación da Fundación Biomédica Galicia Sur, entidade sen ánimo de lucro, con sede no Hospital Álvaro Cunqueiro, Estrada de Clara Campoamor, 341, 36312 Vigo, Pontevedra, con CIF.: G 36911972. Actúa debidamente lexitimado para este acto, en virtude do seu cargo de Presidente do Padroado, no exercicio de poderes que lle foron conferidos o 22 de setembro de 2020, de acordo coas competencias que lle outorga o artigo 19 dos seus Estatutos fundacionais.

Ambas partes recoñécense capacidade xurídica e lexitimación suficiente para subscribir este convenio de colaboración, e

EXPOÑEN

Primeiro.- Que o Servizo Galego de Saúde é un organismo autónomo creado pola Lei 1/1989, do 2 de xaneiro e adscrito á Consellería de Sanidade, que ten atribuídas as competencias precisas para o desenvolvemento de todas as áreas que configuran o concepto integral de saúde, xestionando a sanidade en todas as súas facetas, de conformidade co previsto no Título VI da Lei 8/2008, de 10 de xullo, de saúde de Galicia.

A súa presidencia correspóndelle á persoa titular da Consellería de Sanidade.

Segundo.- Que a Fundación Biomédica Galicia Sur (en adiante a FBGS) con domicilio no Hospital Álvaro Cunqueiro, de Vigo, ten o obxecto de impulsar a investigación, a docencia, a formación, o desenvolvemento científico-tecnolóxico e a innovación no ámbito sanitario e en Ciencias da Saúde, así como a realización doutras actividades que poidan contribuir á consecución do obxecto fundacional, caracterizado polo interese xeral galego.

O obxecto deste desenvolvemento fundacional poderá realizarse directamente pola Fundación ou mediante a colaboración con outras entidades, organismos, institucións ou persoas que contribúan á consecución dos fins fundacionais.

Terceiro.- Que a Consellería de Sanidade e o Servizo Galego de Saúde establecen como unha das súas liñas estratéxicas a promoción da investigación, innovación e transferencia dos resultados xerados nos centros de investigación e innovación sanitaria, tales como hospitais, centros de saúde e unidades de xestión e administración.

Cuarto.- Que a Lei 8/2008, de 10 de xullo, de saúde de Galicia, no artigo 131 (principios xerais), no seu apartado 1 establece que promoverá a investigación biosanitaria, como un instrumento para a mellora da saúde da poboación tendo en conta as prioridades marcadas nos plan de investigación e innovación vixentes en cada momento. Todos os centros e servizos sanitarios estarán en disposición de favorecer e desenvolver a investigación, e promoverán a cultura científica, tecnolóxica e de innovación.

Así mesmo, no apartado 2 do dito artigo, entre outros, dise que a administración sanitaria tamén promoverá a valorización, a protección e a transferencia do amplo coñecemento xerado polo seu persoal e/ou nos seus centros co obxecto de que os resultados da investigación sexan transferidos á sociedade, así como un modelo de innovación aberta orientado a impulsar a creatividade, a cooperación e a aplicación no sistema sanitario dos cambios que acheguen valor a pacientes e profesionais.

Quinto.- Que ambas partes consideran de mutuo interese para o cumprimento das súas respectivas funcións establecer fórmulas de colaboración para fomentar canais de comunicación comúns e apoiar o establecemento de sinerxias e aproveitamento de recursos dos axentes do sistema de divulgación do coñecemento en saúde.

Sexto.- Que a Medicina de Precisión xorde como un *"novo enfoque para o tratamento e a prevención das enfermidades, que ten en conta a variabilidade individual nos xenes, o medio ambiente e o estilo de vida de cada persoa"* (Ashley EA. The Precision Medicine Initiative: A New National Effort. JAMA 2015;313:2119–20).

Supón dispor de información xenómica e molecular a nivel individual, e ter a capacidade de integrala con información clínica, social, ambiental e de conduta, para mellorar o diagnóstico, o tratamento e/ou a capacidade de predicir ou evitar o desenvolvemento de enfermidades.

Sétimo.- Que moitos países da nosa contorna teñen establecidas cohortes multipropósito de voluntarios a grande escala que contan con información epidemiolóxica e contextual extensa

e detallada actualizada periódicamente; con un biobanco que almacena mostras biolóxicas de múltiples tipos nas que se aplican os novos avances biotecnolóxicos; con enlaces a grandes bases de datos de información clínica e non clínica, e con seguimento a moi longo prazo, mediante unha exhaustiva recollida prospectiva dos desenlaces e eventos clínicos, así como medidas repetidas de diversas exposicións, que permiten identificar as relacións das exposicións e o seus cambios ao longo do tempo cos eventos de saúde e enfermidade.

Por exemplo, en Estados Unidos "[All of Us](#)" , Reino Unido "[UK Biobank](#)", Francia "[CONSTANCES](#)", Alemaña "[NAKO](#)", Holanda "[Lifelines](#)" o en Suecia "[Lifegene](#)", cuxo obxectivo é identificar mellor as causas da enfermidade, avaliar o risco de enfermidade e permitir adaptar mellor a predición, prevención e tratamento ás características específicas de cada persoa. Grazas ao seu gran tamaño e á calidade da información, estanse convertendo en ferramentas imprescindibles para a investigación no ámbito da saúde.

O obxectivo final é unha medicina máis segura, eficiente, preventiva e predictiva, cada vez de carácter máis personalizado.

Oitavo.- Que o Programa de Medicina Preditiva da Infraestrutura de Medicina de Precisión asociada á Ciencia e Tecnoloxía (**Programa Cohorte-IMPACT**) é o equivalente en España ás iniciativas internacionais mencionadas. Está liderado por CIBER (Consortio Centro de Investigación Biomédica en Rede), e no seu desenvolvemento están implicadas entidades dos Servizos de Saúde de todas as Comunidades e Cidades Autónomas, o Instituto Nacional de Estatística e, por suposto, todas as áreas temáticas de CIBER.

Noveno.- Que o Servizo Galego de Saúde e CIBER suscribiron con data 9 de maio de 2022 o correspondente convenio, co obxecto de articular a relación entre ambos para a distribución dos fondos con ocasión da participación no Proxecto IMPACT de Medicina Preditiva, IMPACT-Cohorte (número de expediente IMP/00021) no que o Servizo Galego de Saúde actúa como entidade colaboradora segundo o Plan de Actuación do Programa.

Décimo.- Que a Consellería de Sanidade, a través do Servizo Galego de Saúde, e a FBGS consideran que o convenio de colaboración para o desenvolvemento do Programa IMPACT-Cohorte é un instrumento eficaz de financiamento para a promoción da I+D+i de excelencia nas institucións sanitarias de Galicia.

Undécimo.- Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou de outro instrumento alleo á natureza estritamente convencional.

Dada a especificidade do obxecto do convenio de colaboración, non procede a realización dunha convocatoria pública para o desenvolvemento das actuacións do mesmo, debido as especiais características e singularidade da FBGS como centro de referencia no ámbito sanitario e en Ciencias da Saúde.

Así mesmo, convenios de colaboración similares serán asinados co resto das fundacións sanitarias integrantes do sistema autonómico de I+D+i sanitario do Servizo Galego de Saúde.

Por todo o anterior, a efectos do establecido nos artigos 19 e 26 da Lei 9/2007, de 13 de xuño, de subvencións de Galicia, no artigo 40 do Decreto 11/2009, do 8 de xaneiro, polo que se aproba o regulamento da citada Lei e no artigo 15.2 da Lei 1/2016, do 18 de xaneiro, de transparencia e bo goberno, as partes asinantes acordan subscribir o presente convenio de colaboración para o desenvolvemento do Programa Cohorte IMPaCT pola FBGS, ente xestor da investigación do Sistema Público de Saúde de Galicia, de acordo coas seguintes:

CLÁUSULAS

Primeira.- Obxecto

O obxecto do convenio de colaboración é a realización dun conxunto de actividades dirixidas á creación da cohorte de base poboacional Cohorte IMPaCT na comunidade autónoma de Galicia.

Os seus obxectivos explícitos son:

- I. Mellorar a comprensión das causas das enfermidades e condicións de saúde que son prioritarias en saúde pública, incluídos o deterioro funcional asociado á idade, as lesións e a discapacidade.
- II. Monitorizar o estado de saúde da poboación, con especial atención ás desigualdades en saúde (Saúde Pública de precisión).
- III. Predicir o risco de enfermidade e de outras condicións de saúde, incluídos o deterioro funcional asociado á idade, as lesións e a discapacidade. (Medicina Preventiva de precisión).
- IV. Identificar biomarcadores de enfermidade subclínica ou en fases iniciais, así como biomarcadores de fenotipos específicos de potencial utilidade na práctica clínica (Medicina Clínica de precisión).

Segunda.- Actividades obxecto do convenio

Tódalas actividades terán como finalidade a creación dunha cohorte de base poboacional segundo os requisitos establecidas no deseño do estudo.

Trátase dunha cohorte prospectiva multipropósito, que está previsto que chegue aos 12.000 participantes na nosa comunidade autónoma, dos que 4.000 pertencerán á área sanitaria de Vigo. Estes participantes seguiranse con medicións e enquisas repetidas no tempo.

A cohorte IMPaCT permitirá explorar os determinantes sociais, ambientais e biolóxicos da saúde e as enfermidades de maior importancia en saúde pública no noso país, así como as condicións que representan os principais determinantes de saúde.

Terceira.- Condicións económicas de financiamento das axudas

O Servizo Galego de Saúde financiará por un importe total de **cento dezaseis mil seiscientos sesenta e seis con sesenta e sete euros** (116.666,67 €) as actuacións para a anualidade 2023 con cargo á aplicación orzamentaria 5001.412B.481.00 do Servizo Galego de Saúde na cal existe crédito axeitado e suficiente.

Poderán realizarse pagamentos anticipados, de acordo co establecido no artigo 31.6 da Lei 9/2007, do 13 de xuño, e nos artigos 63, 65 e 67 do Decreto 11/2009, do 8 de xaneiro.

Os pagamentos anticipados suporán entregas de fondos con carácter previo á xustificación, como financiamento necesario para poder levar a cabo a actuación nos casos nos que o gasto aínda non estea realizado.

Os pagamentos correspondentes realizaranse de conformidade co previsto no artigo 31 da Lei 9/2007, do 13 de xuño e 63.3 do Decreto 11/2009, do 8 de xaneiro, e faranse efectivos do seguinte xeito:

Coa sinatura do presente convenio realizarase o pagamento anticipado do 50% da subvención total concedida. A concesión do anticipo realizarase de oficio unha vez asinado o presente convenio.

De acordo co artigo 65.4. f) do Decreto 11/2009, do 8 de xaneiro, os pagamentos anticipados e a conta quedan exonerados da constitución de garantía.

Tras a xustificación do anticipo, a Fundación poderá presentar xustificacións en función do ritmo de execución da acción subvencionada que darán lugar a pagamentos a conta que, sumados ao importe anticipado, non poderán superar o 80% da subvención. O 20% restante aboarase no momento da completa execución por parte do beneficiario e logo da comprobación do cumprimento das condicións establecidas nas cláusulas do convenio.

Cuarta.- Axudas de Estado

De acordo co disposto no artigo 2.1.1 da Comunicación da Comisión sobre o Marco de Axudas Estatais de Investigación e Desenvolvemento e Innovación (2022/ C 414/01), non se aplicará o disposto no artigo 107.1 do Tratado de Funcionamento da Unión Europea á axuda prevista neste convenio, xa que se outorga a un organismo de investigación para actividades non económicas.

En aplicación do anterior, a axuda contemplada neste convenio non terá a consideración de axuda de Estado.

De acordo co disposto no parágrafo 21 do artigo 2.1.1 do Marco Comunitario cando o organismo de investigación ou a infraestrutura de investigación se utilicen case

exclusivamente para unha actividade non económica, poderán quedar excluídos na súa totalidade do ámbito de aplicación do artigo 107.1 do Tratado de Funcionamento da Unión Europea sempre que o seu uso económico sexa puramente accesorio, é dicir, corresponda a unha actividade que estea relacionada directamente co seu funcionamento ou sexa necesaria para o funcionamento do organismo de investigación ou a infraestrutura de investigación ou estea estreitamente vinculado ao seu principal uso non económico, e teña un alcance limitado.

Quinta.- Período de execución da actividade e prazo de xustificación

As actividades obxecto de axuda deben ser realizadas dentro do período comprendido entre o 01 de xaneiro de 2023 e o 15 de decembro de 2023, sen prexuízo de que se poida modificar este período segundo o establecido na cláusula décimo cuarta.

Consideraranse gastos subvencionables os indicados na cláusula sétima deste convenio.

O prazo de xustificación do proxecto terá como data final o 20 de decembro de 2023.

A subvención obxecto deste convenio é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais, sen prexuízo do disposto no artigo 17.3 da Lei 9/2007, do 13 de xuño.

O importe da subvención, illadamente ou en concorrencia con outras subvencións, axudas ou ingresos non poderá superar o custo da actividade subvencionada.

Sexta.- Compromisos, publicidade e autorizacións

1. A FBGS comprométese a:

- Desenvolver as actividades recollidas na cláusula segunda a desenvolver ao longo do ano 2023 con cargo a este programa **Cohorte IMPaCT**.
- Por a disposición dos profesionais dos grupos de investigación vinculados ao Servizo Galego de Saúde e á Fundación Biomédica Galicia Sur os equipos e servizos de apoio á investigación da súa titularidade para o desenvolvemento das actuacións do presente Convenio.
- Facerse cargo do seguimento, avaliación e control das actividades vinculadas á execución do presente convenio.
- Proceder ao reintegro, total ou parcial, da axuda percibida no suposto de incumprimento das condicións establecidas para a súa concesión.
- Subministrar toda a información necesaria para que o Servizo Galego de Saúde poida dar cumprimento ás obrigas recollidas na Lei 1/2016, do 18 de xaneiro, de transparencia e bo goberno.

- No caso de que o beneficiario non atenda ao requirimento de información en prazo, procederase conforme ao establecido no artigo 4.4 do citado texto legal.
- Facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas respectivas funcións de fiscalización e control de destino das axudas concedidas e posibilitar a inspección e control dos órganos do Servizo Galego de Saúde co gallo de supervisar o cumprimento das actividades do convenio.
- Comunicar ao Servizo Galego de Saúde a concesión de calquera outra axuda concedida para o mesmo fin tan pronto se teña coñecemento da mesma.
- Cumprir o disposto no artigo 11 da Lei 9/2007, do 13 de xuño.
- Facerse cargo da comunicación e a publicidade asociadas ao presente Programa Cohorte IMPaCT, segundo a documentación e instrucións que se establezan polo CIBER a través do Servizo Galego de Saúde.
- Dar consentimento expreso ao Servizo Galego de Saúde para o cumprimento do disposto no artigo 20 da Lei 38/2003, do 17 de novembro, xeral de subvencións, polo que a información relativa ao convenio requirida no ordinal oitavo do devandito artigo será comunicada á Base de datos nacional de subvencións (BDNS) a través da páxina web, www.pap.minhap.gob.es/bdnstrans/es/index.

2. Pola súa parte, o Servizo Galego de Saúde comprométese a:

- Facerse cargo do orzamento necesario para a execución das actividades vinculadas ao convenio conforme ás cláusulas do mesmo.
- Por a disposición dos profesionais vinculados ao programa Cohorte IMPaCT. os espazos e equipos da súa titularidade necesarios para o seu desenvolvemento.
- Asumir a preparación necesaria para a contratación das actividades vinculadas a empresas e organizacións externas no presente convenio.

3. Os asinantes do convenio manifestan o seu consentimento para que o seus datos persoais que consten no convenio, e mailo resto de especificacións contidas no mesmo, poidan ser publicados no Portal da Transparencia e Goberno Aberto.

4. A sinatura do convenio comportará a autorización ao órgano xestor para consultar as certificacións que deban emitir a Axencia Estatal da Administración Tributaria, a Tesourería Xeral da Seguridade Social e a consellería competente en materia de facenda da Xunta de Galicia segundo o establecido no artigo 20.3 da Lei 9/2007, do 13 de xuño. Non obstante, a entidade beneficiaria poderá opoñerse a súa consulta polo órgano xestor, e nese caso deberá presentar as certificacións nos termos previstos regulamentariamente.

Sétima.- Gastos subvencionables.

De acordo co previsto no artigo 29 da Lei 9/2007, do 13 de xuño, consideraranse subvencionables os gastos que, sen admitir dúbida, respondan á natureza da actividade subvencionada de acordo co recollido na cláusula segunda deste convenio e que sexa realizado e efectivamente pagado con anterioridade ou no mesmo día da finalización do período de xustificación indicado na cláusula cuarta, exceptuando aqueles gastos realizados e que por imperativo legal non se puideran ter pagado nese prazo, por axustáranse aos calendarios de recadación, como os ingresos a conta do IRPF ou cotas por seguros sociais liquidables con posterioridade á data de xustificación

En ningún caso o custo de adquisición dos gastos subvencionables poderá ser superior ao valor de mercado.

Os custos subvencionables responderán ás seguintes categorías:

I. Custos de persoal

II. Custos de bens e servizos:

Material funxible, servizos e subministracións.

III. Custos de viaxes e axudas de custo

En ningún caso se considerarán gastos subvencionables os impostos indirectos cando sexan susceptibles de recuperación ou compensación nin os impostos persoais sobre a renda. O imposto sobre o valor engadido (IVE) poderase considerar gasto subvencionable cando a Fundación acredite mediante a correspondente certificación que se encontra acollida ao réxime de exención do IVE.

Tampouco serán en ningún caso subvencionables os xuros debedores das contas bancarias.

No marco do convenio entre CIBER e o Servizo Galego de Saúde, CIBER ten a facultade para establecer os custos subvencionables e as normas xerais de execución e xustificación económica do proxecto, que serán comúns para todas as comunidades autónomas. O Servizo Galego de Saúde como único interlocutor coa FBGS remitiralle as normas para o seu cumprimento.

Oitava.- Xustificación das axudas

Con carácter xeral, a FBGS en canto entidade beneficiaria deberá entregar, no prazo indicado na cláusula quinta, a seguinte documentación:

- a) Memoria final explicativa das actividades desenvolvidas e dos obxectivos acadados segundo o recollido no Programa Cohorte IMPaCT, segundo o modelo que se estableza.
- b) Declaración responsable de outras axudas segundo o modelo que se estableza.
- c) Relación de gastos asinada polo xerente ou director da Fundación.

- d) Documentación acreditativa de realización dos restantes gastos, que consistirá en orixinais ou copias compulsadas da documentación acreditativa dos investimentos ou actuacións consistentes en facturas dos provedores ou documentos de valor probatorio equivalente con validez no tráfico xurídico mercantil ou eficacia administrativa, segundo o establecido no artigo 28.3 da Lei 9/2007, do 13 de xuño e no artigo 48 do Decreto 11/2009, do 8 de xaneiro. Para cada tipo de gasto deberá seguirse as normas remitidas polo Servizo Galego de Saúde.

As facturas deberán conter suficiente información de detalle que permita relacionala co gasto xustificado. Cando o beneficiario non dispoña de facturas electrónicas, deberá achegar unha copia en formato pdf dos documentos orixinais. En aqueles casos nos que a devandita información non sexa suficiente, haberá de aclarar o gasto realizado por outros medios.

- e) Documentación acreditativa de realización dos pagamentos, que consistirá en orixinal ou copia compulsada da documentación bancaria dos pagamentos, ou documentos obtidos a través da banca electrónica. Presentarase xunto a cada documento de gasto o seu correspondente documento de pagamento ou o extracto bancario onde figure o cargo correspondente.

Non se admitirán os pagamentos en efectivo. Os xustificantes bancarios de pagamento deben coincidir exactamente co importe da factura, IVE incluído. No caso de que o importe reflectido no documento bancario non coincida co importe do documento de gasto (pagamento agrupado), deberase remitir o detalle dos pagamentos efectuados xunto cos documentos de gasto, onde se poida identificar o gasto en cuestión.

- f) No suposto de que o importe do IVE supoña un custo real soportado polo beneficiario poderá ser considerado un gasto subvencionable. Neste caso deberase presentar un certificado relativo á situación do beneficiario con respecto ao IVE. No caso de que o réxime do IVE sexa a pro rata, o gasto subvencionable calcularase en base a pro rata definitiva do último exercicio pechado antes da concesión da axuda, sendo responsabilidade do beneficiario realizar os axustes correspondentes na liquidación das obrigas fiscais.

- g) Tres ofertas de diferentes provedores cando o importe do gasto, no caso de adquisición de material funxible non inventariable e contratación de servizos ou subministracións e materiais, supere as contías establecidas para o contrato menor no global do proxecto cun mesmo provedor. Cando polas especiais características dos gastos non exista no mercado suficiente número de entidades que os presten ou subministren, deberá achegarse unha xustificación de tal circunstancia. Se a elección entre as ofertas presentadas non tivese recaído na proposta económica máis vantaxosa, deberá achegarse unha memoria xustificativa.

Non obstante, no caso de que as entidades beneficiarias reúnan os requisitos previstos na Lei 9/2017, de 8 de novembro para ter a consideración de poder adjudicador deberán someterse á disciplina de contratación pública nos termos previstos no devandito texto legal.

h) Carta de pagamento de reintegro no suposto de remanentes non aplicados, así como os xuros derivados destes, conforme ao establecido no artigo 48.2.g) do Decreto 11/2009, do 8 de xaneiro.

Os beneficiarios deberán presentar a documentación, asinada electronicamente e no prazo indicado na cláusula cuarta, na sede electrónica da Xunta de Galicia, mediante a cumprimentación do procedemento electrónico denominado "PRESENTACION ELECTRONICA DE SOLICITUDES, ESCRITOS E COMUNICACIÓNS QUE NON CONTEN CUN SISTEMA ELECTRÓNICO ESPECÍFICO NIN CUN MODELO ELECTRONICO NORMALIZADO" (PR004A)", dirixíndoas á atención da subdirección xeral de Atención Primaria.

Transcorrido o prazo indicado sen que o beneficiario presentase a documentación solicitada, requirirase para que a presente no prazo improrrogable de dez días.

A falta de presentación da xustificación no prazo establecido comportará a perda do dereito ao cobramento total ou parcial da axuda e a esixencia do reintegro e demais responsabilidades establecidas na Lei de subvencións de Galicia. A presentación da xustificación no prazo adicional establecido neste parágrafo non eximirá o beneficiario das sancións que, conforme a lei, correspondan.

A comisión de seguimento considerada na cláusula décimo quinta do presente Convenio determinará e validará a realización das actividades e a súa xustificación en sesión ordinaria logo da recepción da documentación e poderá solicitar as aclaracións ou informes que considere oportunos.

Así mesmo, se a entidade beneficiaria presenta unha xustificación de gastos inferior ao anticipo percibido deberán acompañar á documentación presentada o xustificante de ingreso na conta da Comunidade Autónoma do importe percibido e non xustificado.

Novena.- Natureza xurídica

O presente convenio ten natureza administrativa rexerese pola Lei 39/2015, do 1 de outubro, de procedemento administrativo común das Administracións públicas e pola Lei 40/2015, do 1 de outubro, de réxime xurídico do sector público e ao abeiro dos artigos 19.4 e 26 da Lei de Subvencións de Galicia.

De conformidade co disposto no artigo 6 da Lei 9/2017, do 8 de novembro, o presente convenio de colaboración está excluído do ámbito de aplicación desta lei. Non obstante, de conformidade co previsto no artigo 4 da dita lei, aplicaranse os principios desta para resolver as dúbidas e lagoas que puideran presentarse.

Décima.- Propiedade intelectual

En ningún caso as cláusulas do presente convenio supoñen a cesión ou transmisión de calquera dereito de propiedade intelectual ou industrial titularidade das partes.

Segundo o establecido no convenio entre CIBER e o Servizo Galego de Saúde todos os dereitos derivados dos resultados xerados na execución do convenio de colaboración e a

participación nos mesmos repartiranse de conformidade co disposto na Lei 24/2015, do 24 de xullo, de Patentes e nos convenios polos que se establece o marco dentro do que se van desenvolver as relacións entre CIBER e o Servizo Galego de Saúde. Os mencionados dereitos de propiedade industrial ou intelectual regularanse mediante a sinatura dun contrato de cotitularidade entre las partes con cotitularidade.

Os dereitos derivados da execución deste convenio de colaboración, sen prexuízo do establecido no parágrafo anterior, serán de titularidade e uso común das partes que interveñen na formalización do presente convenio, sen que ningunha delas asuma a súa explotación ou uso exclusivo.

Os dereitos morais dos e das autores veranse sempre preservados.

En materia de publicacións, rexerá para as partes o disposto na Resolución do 17 de setembro de 2020, da Dirección do Instituto de Salud Carlos III O.A., M.P., pola que se aproba a convocatoria de concesión de subvencións para a Infraestrutura de Medicina de Precisión asociada á Ciencia y la Tecnología (IMPACT).

Para o non previsto expresamente nesta cláusula aplicaranse con carácter supletorio as normas contidas no Real Decreto Lexislativo 1/1996, do 12 de abril, polo que se aproba o texto refundido da Lei de Propiedade Intelectual e na normativa de dereito da propiedade industrial.

Undécima.- Protección de datos

De conformidade co establecido no Regulamento (UE) 2016/679 do Parlamento Europeo do Consello de 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE, así como na Lei Orgánica 3/2018, do 5 de decembro, de Protección de Datos Persoais e Garantía dos Dereitos Dixitais, ambas partes se comprometen a gardar a mais estrita confidencialidade respecto de calquera das informacións, datos e documentación de carácter persoal á que teñan acceso en virtude do presente convenio e ao deber de gardalos, sen que poidan ser utilizados para usos diferentes aos previstos no mesmo, facendo constar de maneira expresa que velarán polo cumprimento da normativa de protección de datos persoais de aplicación en cada caso. Estas obrigacións subsistirán incluso despois de concluída a presente colaboración.

Décimo segunda.- Non exclusividade

Este convenio non limita as partes para establecer acordos de colaboración con outros terceiros, se fose necesario, para accións relacionadas co obxecto do mesmo.

Décimo terceira.- Vixencia

O prazo de vixencia deste convenio vai dende a data da súa sinatura ata o 31 de decembro de 2023, podendo prorrogarse o seu prazo de execución por mutuo acordo das partes antes da súa finalización.

Décimo cuarta.- Réxime de modificación do convenio

De acordo co establecido no artigo 49 g). da lei 40/2015, do 1 de outubro, o convenio poderá ser modificado coa finalidade de, caso de ser necesario, adaptar os seus contidos e as obrigas das partes a efectos de poder realizar as actividades previstas para a consecución dos obxectivos establecidos. Igualmente, poderá ser modificado como consecuencia dos acordos que o Servizo Galego de Saúde e o CIBER poidan adoptar no marco da execución do convenio subscrito o 9 de maio de 2022 e que poidan repercutir no deseño ou modificación das actividades especificadas na cláusula segunda deste convenio.

Así mesmo, as modificacións poderán afectar ao volume das actuacións a desenvolver pola FBGS, ao seu prazo de execución ou a necesidades de financiación adicional das mesmas.

En todo caso, a modificación do contido do convenio requirirá acordo das partes asinantes. e formalizarase mediante a correspondente addenda.

Décimo quinta.- Comisión de seguimento

No caso de dúbidas ou desavinzas na interpretación deste convenio, calquera das partes asinantes poderá instar a creación dunha Comisión de Seguimento, para dirimir as mesmas, que se reunirá a instancia de calquera delas e que estará formada polos seguintes representantes:

Polo Servizo Galego de Saúde: O Investigador Principal (IP) do proxecto na Comunidade Autónoma ou persoa en quen delegue, o cal ostentará voto de calidade en caso de empate.

Pola Fundación: A persoa que asine o convenio ou persoa en quen delegue.

Son funcións desta comisión de seguimento:

- I. Velar polo cumprimento das accións do Programa Cohorte IMPACT segundo o protocolo establecido.
- II. O seguimento do desenvolvemento e aplicación do presente Convenio e das actividades realizadas, así como a adopción de decisións sobre os mesmos.
- III. A coordinación das accións de apoio á protección, valorización e transferencia, e o desenvolvemento dos medios adecuados para a súa implementación, de ser preciso.
- IV. A resolución daquelas dúbidas que puideran xurdir no cumprimento, execución ou interpretación deste Convenio.
- V. Modificación das cláusulas contidas no presente Convenio.

Décimo sexta.- Causas de resolución

Poderá dar lugar á resolución do Convenio:

- I. A introdución de modificacións no Programa Cohorte IMPACT aprobado pola comisión sen xustificación e sen previa autorización escrita do Servizo Galego de Saúde.

- II. O incumprimento das cláusulas do convenio (total ou parcialmente), que a cada parte lle corresponden.
- III. A suspensión do convenio por parte do Servizo Galego de Saúde por razóns de interese público.
- IV. O acordo expreso e por escrito das institucións asinantes.
- V. A denuncia de calquera das partes asinantes, sempre que o notifique ás outras partes con dous meses de antelación á data de finalización da vixencia do convenio.

Décimo sétima.- Xurisdición

Este convenio ten natureza administrativa e rexerase polo disposto nas súas cláusulas e, no seu defecto, pola Lei 9/2007, do 13 de xuño, e polo Decreto 11/2009, do 8 de xaneiro, en todo o que non se opoña á lei.. As dúbidas que se poidan presentar sobre a súa interpretación resolveranse de mutuo acordo entre as partes pola Comisión de Seguimento. Non obstante, no caso de persistencia do desacordo, corresponderá á xurisdición contencioso administrativa resolver as cuestións litixiosas que poidan xurdir da súa interpretación e cumprimento.

Décimo oitava.- Inexistencia de relación contractual

A subscrición deste convenio non comporta relación laboral, contractual ou de calquera outro tipo entre o Servizo Galego de Saúde e os/as profesionais que realicen as actividades que constitúen o seu obxecto, de tal xeito que por este concepto non se lle poderán exixir responsabilidades, nin directas nin subsidiarias, polos actos acaecidos no seu desenvolvemento.

Décimo novena.- Rexistro de convenios, transparencia e bo goberno

A sinatura deste convenio de colaboración leva implícito o consentimento expreso das persoas intervinientes para que a Administración pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, na Lei galega 1/2016, do 18 de xaneiro, de transparencia e bo goberno

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, do 20 de xuño, polo que se regula o Rexistro de Convenios da Xunta de Galicia.

E, para que así conste, asinan o presente convenio de colaboración no lugar expresado no encabezamento.

Polo **SERVIZO GALEGO DE SAÚDE**

Pola **Fundación Biomédica Galicia-Sur**

Asdo.: Julio García Comesaña

Asdo.: Francisco Javier Puente Prieto